

Kennsla á vorönn 2014 hófst mánudaginn 7. janúar. Kennslu lauk miðvikudaginn 7. maí og síðustu próf voru 20. maí. Önninni lýkur svo þegar skólameistari slítur þessari samkomu og þeir 53 nemendur sem nú útskrifast hafa fengið skirteini sín afhent.

Í febrúar voru nemendur Fjölbrautaskólans 520 talsins en í fyrra voru þeir 541. Nemendum hefur því fækkað lítillega eftir að þeim hafði fjölgað annirnar á undan.

Eldri nemendur eru rúm 30% nemenda skólans eins og undanfarnar annir, stór hluti þeirra í svokölluðu dreifnámi. Dreifnámsnemendur eru í fjarnámi en mæta í skólann nokkrum sinnum á önninni, gjarnan á kvöldin og um helgar. Þannig getur fólk sótt skóla en jafnframt stundað vinnu. Dreifnámið hefur einnig gert fólk sem býr utan Akraness mögulegt að ljúka námi þó það sé komið yfir hefðbundinn skólaaldur og sé í fullri vinnu í sinni heimabyggð. Þetta fullorðna fólk vill mæta í tíma í skólanum til að hitta kennara sinn og aðra nemendur. Það segir gjarnan að það sé ekki nóg að vera í tölvusambandi við kennarann, nauðsynlegt sé að geta hitt hann a.m.k. nokkrum sinnum á önninni. Reynslan sýnir líka að nemendur sem einungis eru skráðir í fjarnám flosna frekar úr námi en þeir sem sækja tíma. Boðið hefur verið uppá dreifnám á sjúkraliðabraut, í húsasmíði og í vélvirkjun. Næsta haust verður einnig boðið uppá pípulagnir í samvinnu við Iðnskólann í Hafnarfirði svo og meistaranám.

Fjöldi nemenda 16 til 20 ára er svipaður og verið hefur. Karlar eru 60% nemenda en konur 40%. Ívið fleiri konur en karlar eru í stúdentsnámi en hins vegar eru 97% iðnnema karlar.

Á önninni hættu 24 nemendur og til viðbótar skráðu allmargir sig úr áföngum. Þetta þýðir að brottfall á önninni var um 6% sem er heldur undir meðallagi í Fjölbrautaskóla Vesturlands og töluvert minna en í öðrum framhaldsskólum.

----

Nú í lok vorannar láta tveir kennarar af störfum en það er þær Jóhanna Hálfðánsdóttir kennari í frönsku og Hjördís Árnadóttir námsráðgjafi og lífsleiknikennari. Eru þeim færðar þakkir fyrir störf þeirra við skólann. Margrét Þóra Jónsdóttir kom til starfa úr barneignaleyfi í lok annarinnar. Ólöf Samúelsdóttir kennari og námsráðgjafi var í veikindaleyfi á seinni hluta annarinnar. Fyrir hana kenndu Birna Björk Sigurgeirsdóttir, Berglind Ósk Pétursdóttir og Jónína Víglundsdóttir. Jens Baldursson aðstoðarskólameistari verður í leyfi á næsta skólaári. Hafdís Fjóra Ásgeirsdóttir verður aðstoðarskólameistari í hans stað. Flemming Madsen kennari í rafiðnum og Marta Dögg Pálmadóttir kennari á starfsbraut verða í leyfi.

----

Í upphafi annarinnar benti allt til þess að skólastarfið yrði með svipuðu sniði og verið hefur undanfarnar vorannir. Svo fór þó ekki því mánudaginn 17. mars hófst verkfall kennara. Nemendum bauðst að nýta sér aðstöðuna í skólanum og læra í verkfallinu en lítið var um slíkt og er mér sagt að hér í skólanum hafi verið heldur dauflegt um að litast þessa verkfallsdaga. Verkfallið stóð í þrjár vikur en því lauk föstudaginn 4. apríl. Að verkfallinu loknu var samið um lengingu skólaársins en þó þannig að útskrifað er í dag eins og áætlað var í upphafi annarinnar. Klipið var af páskafríinu og prófadagar voru færðir til og þeim fækkað. Svo virðist sem fáir nemendur hafi hætt vegna verkfallsins og námsárangur virðist ekki vera eins slakur og stundum áður í kennaraverkföllum. Kannski er ástæðan sú, að þetta verkfall var ekki eins langt og sum fyrri verkföll.

Í lok verkfallsins var ekki aðeins samið um laun kennara heldur lögðu kennarar áherslu á að fjárhagur skólanna yrði bættur. Vonandi leiða samningarnir til þess að fjárhagur Fjölbrautaskóla Vesturlands batni en framlög til hans hafa verið alls óviðunandi undanfarinn rúman áratug. Brýn þörf er á endurnýjun á

mörgum sviðum en allt slíkt hefur setið á hakanum í langan tíma. Þess má geta að kennarar pólsks iðnskóla heimsóttu okkur í apríl. Þeir skoðuðu skólann og fylgdust með skólafinu. Þeim varð starsýnt á tækjabúnaðinn í málmiðnadeildinni og sögðu að rennibekkir eins og okkar væru löngu aflagðir í pólska skólanum. Þetta er umhugsunarefni fyrir okkur hér á Akranesi sem menntum iðnaðarmenn fyrir eitt helsta iðnaðarsvæði landsins.

Opnir dagar í mars gengu ágætlega sem og stærðfræðikeppnin fyrir grunnskóla.

Nemendur tíundu bekkja Brekkubæjarskóla, Grundaskóla og Heiðarskóla heimsóttu okkur í febrúar og fengu leiðsögn um skólann í fylgd nemenda fjölbrautaskólans. Kynningin tókst vel og eru nemendum okkar sem tóku þátt í þessu færðar þakkir fyrir þeirra framlag.

Skólaþing var haldið í fyrsta skiptið í febrúar. Þá var öllum nemendum skólans skipt í hópa sem áttu að svara spurningunni: hverju á að breyta í FVA á þessu ári og því næsta? Margar ábendingar komu fram og hafa sumar verið framkvæmdar eins og t.d. sú, að nemendur fái að vita fyrir um forföll kennara og þá í gegnum síma. Þá höfðu nemendur eðlilega mikinn áhuga á námsmati, mati á kennurum, félagslífinu o.fl.

Þó ekki sé hægt að verða við öllum ábendingum sem koma frá nemendum þá skapast tækifæri til að ræða við nemendur um skólann og hvað betur má fara og oftast en ekki kemur ýmislegt gott út úr slíkri umræðu. Stefnt er að því að halda slíkt skólaþing árlega.

Gettu betur lið skólans gerði það gott á önninni og komst í keppnina í sjónvarpinu þar sem þeir stóðu sig afskaplega vel. Leiklistarklúbburinn setti upp leikritið Gauragang og bar fólki saman um að það sú sýning hafi tekist vel enda naut hún vinsælda og var vel sótt.

Aðalstjórn nemendafélagsins nú á vorönn skipuðu Margrét Helga Isaksen formaður, Adda Malín Vilhjálmstöttir, Almar Knórr Hjaltason, Bergþóra Ingbórsdóttir, Björn Þór Björnsson og Freyja Kristjana Bjarkadóttir.

Ný stjórn nemendafélagsins fyrir næsta skólaár var kosin í apríl. Formaður fyrir næsta skólaár var kjörinn Þorsteinn Bjarki Pétursson. Með honum í stjórn verða Bergþóra Ingbórsdóttir, Elínborg Egilsdóttir, Heiðmar Eyjólfsson og Sindri Snær Alfreðsson. Sjötti stjórnarmaður verður kjörinn úr hópi nýnema í ágúst.

Elmar Gísli Gíslason og Magnús Gunnarsson voru kosnir stjórnendur Viskuklúbbs, Þorri Línadal Guðnason stjórnandi Ljósmyndaklúbbs, Heiðmar Eyjólfsson, Helgi Sigurðsson og Sindri Snær Alfreðsson stjórnendur Tónlistarklúbbs og stjórnendur Íþróttaklúbbs voru kosnar þær Adda Malín Vilhjálmstöttir og Margrét Helga Isaksen en þær voru jafnframt kosnar stjórnendur GEY (Góðgerðafélagsins Eynis).

----

Læt ég nú lokið annál vorannar 2014 og óska ykkur sem útskrifist frá skólanum til hamingju með þann áfanga sem þið hafið nú náð. Þið megið vera stolt af því að hafa lokið námi við Fjölbrautaskóla Vesturlands og við sem hér störfum erum stolt af ykkur og því sem þið vinnið gott í framtíðinni.

Jens B. Baldursson